




FACTVM,

Pour Messire Jacques de Creny, Cheualier Sieur d'Harceleines, Appellant du Lieutenant Criminel de Beauuais : Monsieur le Procureur General joint avec luy, & Appellant à minima.

Contre Philippes Lessperon Sieur d'Ochencourt, Intimé.



L. s'agit au Procez, d'un Duel commis entre le Sieur d'Ochencourt, defunct Beaufac son Second, le Sieur Dubois frere naturel du Sieur d'Harceleines, & un nommé la Fleur son Second, sur le Territoire de la Baronnie d'Hellicourt, au Ressort du Presidial & Seneschauflée d'Abbeville. La querelle vint entr'eux pour vne Levrette que d'Ochencourt faisoit norrir en sa Ferme d'Haudrechies proche la Maison d'Harceleines; où Dubois estant venu visiter ledit Sieur d'Harceleines apres la mort de la Dame sa Femme, & y ayant sejourné pendant quinze jours, cette Levrette ayant esté perduë, d'Ochencourt s'imagina que Dubois l'auoit prise. Il part aussi-tost d'Abbeville sa demeure ordinaire, bien monté & bien armé: prend Beaufac avec luy qui auoit esté son Valet, pareillement bien monté & bien armé. Ils arriuent vn jour que le Sieur d'Harceleines estoit absent, estant allé en Normandie faire sa prouision de Cidre. L'appel fut aussi-tost fait, & le lendemain matin faisans semblant d'aller à la chasse, ils se trouuerent au rendez-vous, où s'estansaluez, ils mirent pied à terre; & trouuans le fonds trop mol pour se battre, remonterent à cheual, & allerent vn peu plus loin, où ils descendirent & se battirent deux contre deux: Pendant lequel temps vn petit Laquais dudit Dubois nommé Ducroc, tenoit les quatre Cheuaux par la bride. Beaufac fut blessé au bras par la Fleur qui alla aux deux autres; d'Ochencourt rendit l'espée; & apres cela, la Fleur reuint à Beaufac pour luy estancher le sang; luy lia le bras de son mouchoir; & puis ils remonterent tous à cheual, & s'en retournerent tous quatre ensemble jusques aux chemins faisans les routes particulieres de la Maison d'Harceleines & de la Maison d'Haudrechies. D'Ochencourt donna ordre sur le champ de faire penser ledit Beaufac qu'il enuoya pour cet effet à Gamaches, luy defendit de parler du combat, & le chargea de dire au contraire qu'il s'estoit blessé luy-mesme; & luy manda encores apres cela par le Fils de sa Fermiere, de s'en bien souuenir; & incontinent apres il partit pour s'en retourner à Abbeville.

Vne heure ou deux apres, le Sieur d'Harceleines arriua de son voyage de Normandie, qui fut bien surpris de la nouuelle de ce combat, dont il blasma fort ledit Dubois; Et quoy que sur le champ, ledit Dubois eust rendu l'espée à d'Ochencourt, & qu'il apprist qu'il l'auoit traité avec toutes les Ciuilitéz imaginables; Neantmoins, ledit Sieur d'Harceleines voulut accommoder l'affaire: Et ayant sçeu que ledit d'Ochencourt estoit party pour s'en retourner à Abbeville, il remonta au mesme instant à cheual avec Dubois, courans tous deux au galop, & joignirent enfin ledit d'Ochencourt qui marchoit vers Abbeville en la compagnie d'un Gentilhomme de ses Amis nommé le Sieur de Favencourt; Ils se saluerent; Ils parlerent du Combat; D'Ochencourt loua la Ciuilité de Dubois, & fut parlé de l'accommodement: Paroles données, & sur tout cela la nuict estant venuë, eux arriuez à Abbeville, d'Ochencourt ayant appris le lendemain que les Officiers de la Baronnie d'Hellicourt informoient du cas, s'en alla en poste vers le Lieutenant Criminel d'Amiens son Amy & absolument incompetent; luy fit plainte pour se couvrir, que le Sieur d'Harceleines l'auoit fait assassiner, qui est vne calomnie effroyable; Il fit ouïr des Tesmoins, aucun desquels ne parloit selon son intention, quelque chose que pût faire ce Iuge choisi pour aider à la Lettre; Le Preuost des Mareschaux informa aussi d'office; Diuerses Appellations de part & d'autre, portées à la Cour. Et comme Beaufac estoit mort de sa blesseure quatre ou cinq jours apres, d'Ochencourt fit vne Interuention sous le nom de ses heritiers pour obtenir de faire faire le Procez à leur Requête. Sur le tout Arrest contradictoire à l'Audience le 19. Fevrier 1655. suiuant les Conclusions de Monsieur l'Aduocat General Talon; qui dist (& en est fait mention dans l'Arrest) que c'estoit vn Duel, non point vn Assassinat, & qu'il n'y auoit Charge quelconque contre ledit Sieur d'Harceleines; & y auoit lieu deslors de l'enuoyer absolt: Mais qu'il se pouuoit faire que par l'instruction le Sieur d'Harceleines se trouueroit auoir participé: Et ainsi, par l'Arrest dudit jour, on ne receut point l'Interuention des Beaufacs, & au contraire on renuoya les Parties, Charges & Informations pardeuant le Lieutenant Criminel de Beauuais, pour estre le Procez fait &

parfait à la Requête de Monsieur le Procureur General, pour suite & diligence de son Substitut; Que les Decrets seroient executez, & d'Ochencourt tenu de se rendre actuellement Prisonnier dans le mois à peine de conuiction, & ledit Sieur d'Harceleines en estat d'adjourné en personne seulement. Cet Arrest a esté entierement eludé: L'on n'a point fait le Procez à la Requête du Substitut de Monsieur le Procureur General. On l'a fait à la Requête de d'Ochencourt comme Accusateur: On a receu les Beaufacs Parties, & conjointement Accusateurs. Et apres plusieurs Injustices grossieres dans l'Instruction, on a rendu vde Sentence comme d'Ochencourt l'a desirée, le 25. May 1655. où il n'y a ny rithme ny raison. Sentence venale & sans fondement, de laquelle ledit Sieur d'Harceleines a interjetté appel; & Monsieur le Procureur General pareillement *à minima*.

Les Moyens de nullité du Sieur d'Harceleines ont esté fournis, qui enseignent par le detail, qu'il n'y eut jamais vne injustice plus noire que celle du Lieutenant Criminel de Beauvais. Il a adjugé vne réparation de quatre cens liures parisis, & tous les despens du Procez, audit d'Ochencourt, qui est certainement coupable du crime de Duel; Et il a condamné le Sieur d'Harceleines de luy payer cette Somme & ces despens, luy qui n'y a esté ny veu ny sceu, & qui n'y a eu participation quelconque, comme la Preuve du Procez le justifie.

En effet, cette condamnation contre le Sieur d'Harceleines dépend de l'establissement de deux Principes qu'il faudroit estre certains contre luy, dont il n'y a pas seulement de conjectures legitimes & raisonnables. La premiere, *Qu'il fust l'Autheur, & qu'il eust commandé à Dubois & la Fleur de maltraiter d'Ochencourt*. La seconde, *Que ce fust un guet à pens & un assassinat*, comme d'Ochencourt a dit par sa plainte calomnieuse au Lieutenant Criminel d'Amiens.

Or de preuve que ledit Sieur d'Harceleines soit l'Autheur de la querelle, il n'y en a point. D'Ochencourt a voulu dire qu'il estoit son Ennemy à cause d'un Moulin pour lequel il a Procez contre le Sieur d'Isangremel; C'est vne Fiction & vne Fable: Le Sieur d'Harceleines n'y a point d'intereft, & jamais n'ont eu affaire ensemble. L'on a voulu dire encores, que c'estoit à cause de quelque ravage de Gens de Guerre, causé deux ou trois ans auparavant en la Ferme d'Haudrechies, appartenant à d'Ochencourt, qui est dans le voisinage d'Harceleines: C'est encores vne Fiction que cela; S'il y a eu du desordre par des Gens de Guerre, ce n'est pas vne merueille; Et si le Sieur d'Harceleines s'est conserué par son credit, il n'est pas pour cela coupable du desordre fait chez autrui: Le Fermier de d'Ochencourt, auquel on l'a voulu faire dire apres coup, est son Debitteur & en sa dépendance. Mais au reste, c'est un meschant Homme, incapable de tesmoignage, estant infame & noté par Arrest de la Cour, pour auoir fait mourir de faim un enfant adulterin né de ses œuvres & d'une pauvre fille seruante de son Gendre, laquelle il auoit abusée.

Et apres tout, regardant l'affaire dont il s'agit de pleine face & avec toutes circonstances, non seulement on trouuera, que le Sieur d'Harceleines n'en est coupable, ny participant en façon quelconque: Mais que tous les Combatans sont également coupables, estant un Duel qualifié; Et si on le veut dissimuler, & colorer l'action, il ne faut plus parler qu'il y ait de Duels, ny que les Ordonnances seruent à quelque chose; Ce ne sont que des illusions & des piperies. Le Duel dont il s'agit est prouué par cinq Obseruations toutes singulieres.

P R E M I E R E O B S E R V A T I O N.

Sur le fait de la querelle d'entre Dubois & d'Ochencourt.

C'est vne hardie supposition au Seur d'Ochencourt. d'auoir auancé que le sujet de l'animosité qu'il feint auoir esté entre luy & le Sieur d'Harceleines, prouient de deux choses; L'une, de certaine Saisie feodale qu'il dit auoir faite d'un Fief, sur lequel est basti un Moulin à bled appartenant audit Sieur d'Harceleines: Car le Fief dont il parle, ny le Moulin basti sur iceluy, n'a jamais appartenue audit Sieur d'Harceleines, qui n'a point de procez contre luy.

Tout de mesme que de dire que plus de deux ans auparavant, & dès le mois de Septembre 1652. ledit Sieur d'Harceleines luy auoit fait piller sa Terre d'Haudrechie par des Caualliers du Regiment de Bouillon; C'est vne calomnie toute pure: & cela si vray, que dès le 26. jour dudit mois de Septembre 1652. ledit d'Ochencourt fit sa plainte au Senechal de Ponthieu ou son Lieutenant Criminel à Abbeville, suiuant la denonciation qu'il luy auoit fait faire par son Fermier de ladite Terre d'Haudrechie, dans laquelle il n'a pas seulement denommé ledit Sieur d'Harceleines: Et dans l'Information qui s'est faite en suite & au mesme temps par ledit Lieutenant Criminel d'Abbeville, il n'a point esté chargé du tout; & on ne scauroit monstrier qu'il ait seulement obtenu un Adjournement personnel; Car bien loin par ledit Sieur d'Harceleines d'auoir deseruy ledit Sieur

3

d'Ochencourt, ny son Fermier, qu'au contraire, le pays estant lors couuert de gens de guerre, comme l'on sçait que l'année 1652. a esté fort malheureuse au Royaume; & sa Maison d'Harceleines estant plus forte, il a sauué & retiré les bestiaux de ladite Ferme d'Haudrechie par diuerses fois; & mesmes lors que quelques Caualliers en prirent vne fois, soit qu'ils eussent l'Ordonnance de leur Commandant, ou non, ce que ledit Sieur d'Harceleines ne sçait pas, & n'a jamais eu besoin de s'en enquerir; Il faut que ledit d'Ochencourt, son Fermier & sa Fermiere, auoient qu'il leur presta de l'argent pour les déliurer, ayans eu recours à luy comme à vn homme bien-faisant, & qui l'a toujours tesmoigné en toutes sortes de rencontres: & à ce propos, il sera dit en passant, que jamais en sa vie il n'a eu procez Ciuil & Criminel que celuy-cy; Donc voylà les faits que d'Ochencourt veut supposer estre la cause de ce pretendu assassinat, destruits & reduits en fumée.

Bien plus, si ce fait estoit vray, il feroit contre d'Ochencourt: Car vn homme offensé par vn pillage de Gens de guerre, seroit celuy qui seroit l'Agresseur par ressentiment; & ainsi les fables de d'Ochencourt se retournent contre luy.

Mais la veritable cause, non pas d'un Assassinat, mais du Combat & Duel d'entre lesd. Sieurs d'Ochencourt & Dubois, justifiée par le tesmoignage des domestiques dudit d'Ochencourt, tant la verité est pressante, est, qu'il auoit mis dans ladite Terre d'Haudrechie plusieurs chiens de Chasse; & entr'autre vne jeune levrette qui fut perdue, dont le soupçon fut jetté sur ledit Dubois, qui estoit venu voir le Sieur d'Harceleines, apres la mort de la Dame d'Harceleines sa femme. Ochencourt en ayant eu nouuelle à Abbeville, distant de cinq lieues, prist le dessein de s'en faire faire raison; Pour cet effet, il alla prendre ledit Beaufac, qui auoit esté son Laquais cinq ou six ans deuant, & qui auoit appris avec luy en cette ville de Paris à faire des armes, & toute sorte d'exercices de Soldat; lequel il pretend qu'estoit lors en apprentissage de Charon, qui est vne circonstance qui fait entre luy; le monta sur vn tres-bon cheval de prix, & ledit d'Ochencourt sur l'autre, de valeur chacun de sept à huit cens liures. Estans deux bien armez, ils allerent coucher à Seuarpond, qui est plus esloigné d'Abbeville qu'Haudrechie, & qui est encore aussi esloigné, & d'où il y a pareille distance à Haudrechie, que de la ville mesme d'Abbeville: Lors ledit d'Ochencourt alloit audit Seuarpond, parce que proche ledit lieu, est la demeure du Sieur de Nancel, frere dudit Sieur d'Harceleines, auquel lieu il estimoit que ledit Dubois aussi son frere naturel, auroit enuoyé sa levrette; & ce fut le seul entretien qu'il eut avec toute sortes de personnes. Le lendemain matin il vint à Haudrechie, & passa par Harceleines, où il fit le tour de la Maison & l'ardinage dudit lieu, ayant enuoyé ledit Beaufac son Vallet par vn costé, & luy par l'autre, quoy que ce ne fust point le chemin ordinaire pour aller à Haudrechie; & cela se faisoit pour tascher de descouurir cette levrette, & le Sieur Dubois pour luy donner le mot à se battre le lendemain. Ne l'ayant pas lors trouué, il s'en va en la Terre d'Haudrechie, où d'abord le premier mot qu'il dit à son Fermier & à sa Fermiere, ce fut, *Hé bien, Fermiere, ma levrette est donc perdue*, & tesmoigna en suite beaucoup de ressentiment de cette levrette; Et enfin il est vray qu'il fist en sorte de trouuer ledit Dubois, & prirent iour & heure pour le lendemain à se battre. Et ne demeure incertain dans le fait, que de sçauoir s'il auoit pris parole de se battre eux deux seulement, ou avec un second; & il semble qu'ils n'auoient pris parole, du moins asseurée que pour eux seuls, d'autant qu'il s'en alla l'un des premiers; que l'un des seconds nommé la Fleur, dist *qu'il n'estoit pas venu pour regarder, & qu'il se battoit contre un vacher*: & que d'Ochencourt interrogea l'autre s'il vouloit se battre, & qu'il respondit qu'il feroit ce qu'il pourroit; & par effet, se battirent deux contre deux. Et quoy que de ce dernier fait & appel, il n'y ait point de tesmoignage particulier, neantmoins par ce qui a precedé & ce qui a suiuy, il y a necessité necessitante de le presupposer: Car il est bien & deuëment prouué par la deposition de Claude Stoup, Hubert Ducroc & Nicolas Hubert, quinze, seize & dix-huictiesme Tesmoins de l'Information faite à la requeste du Procureur Fiscal d'Hellicourt, que ledit jour de Ieudy auant le combat, ledit d'Ochencourt fut veu venant du Village d'Harceleines, d'où il s'en alla en sa Ferme d'Haudrechie, son Vallet passant de l'autre costé de la Maison, & que le lendemain ils s'estoient battus avec le Sieur Dubois & leurs Vallets les vns contre les autres, ayans baillé leurs Cheuaux à garder au Laquais dudit Dubois: Et remarquent les Tesmoins expressement, *que la Maison dudit Sieur d'Harceleines n'estoit point le chemin dudit Ochencourt pour aller d'aucun lieu dans sa Ferme d'Haudrechie*; & de cela, il n'a peu rendre raison en Iustice par son Interrogatoire, où il se reserue le secret du dessein qu'il auoit, & dit, *que c'estoit pour des considerations particulieres*; c'est à dire qu'il est confus, & qu'il ne sçait que dire, car cela parle tout seul; A quoy il faut joindre le tesmoignage de la deposition de Ieanne Messier, Fermiere dudit Ochencourt en sa Terre d'Haudrechie, septiesme Tesmoin ouï à sa requeste par le Lieutenant Criminel d'Amiens, laquelle bien loin de dire que ledit Sieur d'Ochencourt fust attendu pour l'assassiner au sortir de sa Ferme; que tout au contraire, elle dit que le lendemain matin qui estoit le 30. d'Octobre, sur les huit à neuf heures du matin, ledit Dubois avec vn autre Cauallier, alla dans la

Maison d'Haudrechies demander ledit Sieur d'Ochencourt, & que parlant à la fille de ladite Fermiere, il vſa de ces termes : *Hé, ma fille, Monsieur d'Ochencourt est-il ſorty ?* A quoy elle fit reſponſe qu'oüy ; qu'en ſuite ledit Dubois s'en alla ſuiuy de ſon Garçon & d'un petit Laquais qu'elle nomme Ductoc, c'eſt un enfant de 13. à 14. ans, & qu'environ vne bonne demie heure apres ledit Sieur d'Ochencourt reuint tout ſeul ; ce qui donna ſujet à cette Fermiere de demander audit d'Ochencourt, où eſtoit ſon Garçon, qu'il ſembloit qu'il auoit quelque choſe dans l'eſprit, que ledit d'Ochencourt luy dit, que ſon Garçon eſtoit bleſſé, & l'auoit enuoyé à Gamaches : Et ſur ce que ladite Fermiere le preſſa de dire ce que c'eſtoit, ledit d'Ochencourt luy dit tout bas à l'oreille, *Nous auons fait rencontre de Dubois, ſans s'eſtre expliqué d'auantage, & partit toſt apres pour s'en aller à Abbeville, & que preſque en meſme temps elle apprit qu'ils s'eſtoient battus* : Ce n'eſt pas la marque d'un aſſaſſinat, & ſi eſſectiuement ce n'auoit pas eſté un Duel, il n'y a point de difficulté que non ſeulement la choſe ne ſe feroit point paſſée de la ſorte, mais qu'il n'auoit point parlé de cét air là à ſa Fermiere, & encores tout bas à l'oreille. Donc il eſt tout elair, que les faits que recherche aujourd'huy d'Ochencourt, ſont des malices inuentées, pour noircir la reputation du Sieur d'Harceleines, qui eſt un Gentilhomme d'honneur, qui n'a eſté veu ny ſçeu en tout cela, & pour ſe couvrir par ledit d'Ochencourt d'un crime qualifié qu'il a commis.

Qu'il demeure donc pour conſtant, comme il eſt veritable, que le ſujet de la querelle d'entre d'Ochencourt & Dubois, eſt *la perte de la levrette de d'Ochencourt*, & pour raiſon de quoy il ne vint pas comme il dit par ſes Concluſions ciuiles, d'Abbeville à Haudrechies en chaffant, mais il s'en alla coucher à Senarpond, qui eſt plus eſloigné, & duquel lieu il y a encore vne pareille diſtance à Haudrechies, que d'Abbeville meſme ; En cela il eſt cōtraire à ſoy meſme, parce que ce qu'il a dit par ſes cōcluſions ciuiles, eſt dementy par ſon propre Interrogatoire, où il a confeſſé qu'il auoit eſté coucher à Senarpond ; & pour le ſurplus, il eſt prouué par la deposition de Iacques Vior, Fermier dudit d'Ochencourt, Ieanne Meſſier ſa femme, & Pierre Godart fils du premier Mariage de ladite Meſſier, tous demeurans en ladite Ferme d'Haudrechies : quatorze, dix-sept & dix-neuf teſmoins oüys en l'Information faite à la requête du Procureur Fiſcal de la Beronnie d'Hellicourt, & qui ſont affidez, parce que ce ſont les Domestiques dudit d'Ochencourt, leſquels il a auſſi fait ouïr à ſa requête par-deuant le Lieutenant Criminel d'Amiens, qu'eſtant arriué audit lieu d'Haudrechis, la premiere parole qu'il dit, *Hé bien, Fermiere, ma levrette eſt donc perdue* ; cela marque euidentement comme c'eſtoit le ſujet de ſon voyage. Ledit Pierre Godart dit dauantage, *qu'il luy demanda ſ'il n'auoit pas ſoupçon ſur perſonne : & entre pluſieurs paroles de colere qu'il teſmoignoît, luy demanda meſme ſi le Sieur Dubois n'eſtoit pas homme pour l'auoir priſe*. Il adjouſte à la fin de ſa deposition, *Que le Mercredi auparauant, un Laquais dudit d'Ochencourt eſtant arriué en ladite Ferme d'Haudrechies pour y diſner, & de là s'en aller en la Ferme des Granges, auſſi appartenante audit Sieur d'Ochencourt, querir vne autre levrette pour amener en ladite Ferme d'Haudrechie, où ledit d'Ochencourt ſon Maïſtre ſe deuoit rendre le lendemain qui eſtoit le Ieudy ; Au lieu de quoy faire, il ſ'aniſa d'aller à Senarpond, pour en ſçauoir des nouuelles, & ne vint que le Vendredy ; & ledit Laquais dit audit Godart que ledit Sieur d'Ochencourt ſon Maïſtre eſtoit bien en colere de la perte de ſa levrette, & qu'il feroit ſauter comme des crapaux les Gentilhommes qui l'auoient priſe* ; Voylà donc le ſujet certain du voyage dudit d'Ochencourt, teſmoigné par ſes propres Domestiques, Teſmoins irreprochables, puis-qu'il les a fait ouïr luy-meſme : Et leur teſmoignage n'eſt pas diminué, parce qu'il leur a fait dire au Recollement qu'il eſtoit auſſi allé demander de l'argent audit Fermier, d'autant qu'il n'eſt pas inconuenient que ſon Fermier luy deuant de l'argent, il ne luy en euſt demandé en chemin faiſant ; mais le ſujet de ſa venue & les premieres paroles qu'il ait dites, eſtoient au ſujet de ſa levrette perdue.

C'eſt auſſi vne cauillation toute euidente, que ce qu'il a commandé audit Godart fils de ſa Fermiere, & demeurant actuellement en ſa Ferme audit Haudrechie, de biaïſer d'une plaiſante façon, ſur ce qu'il auoit depoſé *que ledit d'Ochencourt luy auoit parlé du Sieur Dubois, & demandé ſ'il n'eſtoit pas homme pour auoir priſe ſa levrette*, auquel il auoit reſpondu qu'il ne le croyoit pas. Et lors de ſon Recollement, d'Ochencourt luy a voulu faire deſtourner cette parole, en diſant, *ſi elle ne s'eſtoit point perdue dans le Bois* ; C'eſt vne déſaite que cela, qui n'eſt pas capable d'effacer vne verité toute ſenſible, & qui ſe trouue eſcrite au ſurplus de la deposition, & par le Combat qui s'en eſt enſuiuy immediatement apres entre leſdits Sieurs Dubois & d'Ochencourt.

SECONDE OBSERVATION.

Façon du Combat.

IL faudroit eſtre extraordinairement preoccupez, pour s'imaginer apres ce qui reſulte du Procez, quoy que l'on ait peu faire, & que l'on ait obmis avec beaucoup d'affectation d'entendre le Sieur de

de Favencourt, en la presence duquel ledit d'Ochencourt a parlé du Duel, & de toutes les circonstances du Combat, mesme tiré des avantages pretendus de sa valeur: pour dire que le cas dont il s'agit, fust vn assassinat, ny autre chose qu'un duel, soit de premeditation, soit de rencontre, qui sont aussi bien punis l'un comme l'autre par les Ordonnances, mesme par la derniere verifiée en la Cour; & est facile de le voir, puisque le Sieur d'Ochencourt donne la peine audit Sieur d'Harceleines de le conuaincre, par la calomnie qu'il luy a imposée.

Regardant en premier lieu la plainte qu'il a renduë par affectation au Lieutenant Criminel d'Amiens le dernier Octobre mil six cens cinquante-quatre, il met en fait *que le jour precedent, ledit Sieur d'Harceleines sachant que ledit d'Ochencourt estoit dans sa Ferme d'Haudrechie, il auroit enuoyé le nommé Dubois son frere naturel, accompagné de deux Vallers armez de mousquetons & pistolets, lesquels l'auroient attendu à la Campagne sortant de sa Maison pour l'assassiner.*

Or ce fait est tellement faux & supposé, sauf correction, que par le tesmoignage de Jeanne Mesfrier sa Fermiere, septiesme Tesmoin de l'Information faite par le Lieutenant Criminel d'Amiens, à la requeste dudit Sieur d'Ochencourt, & par laquelle il a déclaré en son Interrogatoire, qu'il prenoit droit: Il est constant que le jour du combat, & vne bonne demie heure auparavant iceluy sur les 8. à 9. heures du matin, ledit Sieur Dubois alla dans ladite Ferme d'Haudrechie demander ledit Sieur d'Ochencourt, & vsa de ces termes, *Hé, ma fille, Monsieur d'Ochencourt est-il sorti?* à quoy ayant fait response *qu'oüy*, ledit Dubois s'en alla suiuy d'un Laquais nommé Ducroc: & environ vne demie heure apres, ledit d'Ochencourt reuint tout seul; ce qui auroit obligé la Fermiere de luy demander où estoit son Garçon, & qu'il luy sembloit auoir quelque chose dans l'esprit; Il luy dit que son Garçon estoit blessé, & l'auoit enuoyé à Gamaches; Et enfin pressé de dire ce que c'estoit, il luy dit tout bas à l'oreille, *Nous auons fait rencontre de Dubois:* & la mesme Fermiere en l'Information d'Hellicourt, où elle a esté oüy dix-septiesme Tesmoin, depose que le Vallet dudit d'Ochencourt estant retourné de Gamaches en ladite Ferme d'Haudrechie, il luy dit que ledit Sieur d'Ochencourt & luy auoient fait rencontre de Dubois & un Cavalier qui estoit avec luy, qui les auoient obligez de mettre pied à terre, & de se battre l'un contre l'autre à l'espee; ce qu'ils auoient fait, & auoit esté blessé par ledit Cavalier, qui luy auoit pressé son mouchoir pour estancher le sang qui sortoit de sa playe; Il n'est donc pas vray ce qu'Ochencourt a articulé par sa plainte, que ledit Dubois accompagné de deux Vallers armez de mousquetons & pistolets, l'auoit attendu au sortir de sa Maison pour l'assassiner.

Difons plus, Pierre Godart, fils de cette Fermiere, autre Tesmoin, Domestique dudit d'Ochencourt, oüy en l'Information faite à la requeste dudit Sieur d'Ochencourt par le Lieutenant Criminel d'Amiens, dixiesme Tesmoin: & dans l'Information faite à la requeste du Procureur Fiscal d'Hellicourt dix-neufiesme Tesmoin, a depose apres ce qui a esté cy-dessus représenté de la colere dudit Sieur d'Ochencourt, à cause de sa levrette perduë, que le jour du combat dont est question, le Sieur d'Ochencourt apres auoir déjeuné au matin, le pria de prendre trois levriers, & de monter la Montagne avec luy; ce qu'il fit: & estant au dessus de ladite Montagne, ledit Sieur d'Ochencourt voyant que son homme ne venoit pas, ainsi qu'il luy auoit commandé, il auroit renuoyé ledit Godart pour hastter ledit homme, qui estoit Beaufac, d'amener son Cheual: Et ledit Godart s'estant mis en deuoir de ce faire, il auroit apperceu venir ledit homme ou Vallet à Cheual, tenant en main celuy dudit Sieur d'Ochencourt, qui monta à Cheual, & s'en alla avec son Vallet & ses levriers vers le Village de Buigny pour y chercher le lievre; La Cour obseruera, s'il luy plaist cette circonstance, comme un deguisement préparé à l'action, parce que deux hommes seuls ne se montent point à l'avantage pour aller à la chasse du levrier avec trois levriers, sans qu'il y ait qui que ce soit à pied; & les Cheuaux estoient pour s'en seruir à la course en cas de besoin, & selon l'euement. Vne autre circonstance importante resultant de cette deposition, est, qu'apres que ledit d'Ochencourt & son Vallet, furent ainsi montez à Cheual, *il pria ledit Godart de se donner patience pour quelque peu de temps, & qu'il ne manqueroit pas de passer par le lieu où il le laissoit; mais qu'à cause d'une petite pluye en retournant en ladite Ferme d'Haudrechie & en descendant en ladite Ferme, il apperceut deux Cavaliers qui montoient la Montagne; & à l'endroit du Village d'Harceleines, & assez proche de la Seigneurie dudit Harceleines, & alloient se rendre en la mesme plaine & campagne, où estoit le Sieur d'Ochencourt;* Voylà donc la preuue certaine par un Tesmoin Domestique dudit d'Ochencourt, Tesmoin qu'il a produit luy mesme, que Dubois & son Vallet s'alloient rendre au lieu de l'assignation donnée pour le combat avec d'Ochencourt & son Vallet qui les attendoient dans la plaine. Et il ne sert rien de dire que ce fut Dubois qui ayant fait rencontre dudit d'Ochencourt, l'obligea de mettre pied à terre pour se battre, parce que toutes les circonstances font voir le contraire; Il n'y a pas de replique à ce mot, que tant ledit d'Ochencourt que son Vallet, estoient montez sur chacun un Cheual de sept à huit cens liures, & que s'ils n'eussent pas voulu se battre, ils n'eussent pas attendu ledit Dubois & son Vallet, qui n'estoient montez que sur simples bidets, comme il resulte de l'addition faite au Recollement de Jacques François, Marechal, Tesmoin

produit par ledit d'Ochencourt, & ouï à sa requeste en l'Information faite pardevant le Lieutenant Criminel d'Amiens, deuxiesme Tefmoin, & ouï en l'Information faite à la requeste du Procureur Fiscal d'Hellicourt, dixiesme Tefmoin, lequel expliquant cette circonstance veritable, porte vne conuiction toute entiere contre ledit d'Ochencourt: joint que par la deposition de Maistre Charles Langlois Curé d'Harceleines, Cousin germain dudit Beaufac, dās l'addition par luy faite au Recollement, rapporte encore cette circonstance, *que ledit Beaufac son Cousin luy auoit dit lors qu'il l'alla visiter apres sa blessure, qu'estant monté au dessus du Bois de la Ferme dudit Sieur d'Ochencourt pour aller à la Chasse (c'estoit le pretexte) il auoit veu derriere eux deux Cavaliers & vn Laquais, dont ayant donné arvis audit d'Ochencourt, il luy respondit, Laisse les venir, ou quelqu'autre parole semblable; Il ajousté dans le déguisement & les excuses que ledit Beaufac son Cousin apportoit à l'action qu'il auoit commise, que ledit d'Ochencourt, apres quelques paroles avec Dubois, auoit demandé audit Beaufac en ces termes, Veu-x-tu te battre? à quoy ledit Beaufac fit responce, Je feray ce que ie pourray; & que le Cavalier respondit qu'il se batteroit contre vn vacher, & qu'il n'estoit pas venu pour regarder; ce mot est remarquable, pour faire voir que la parole estoit donnée à se battre entre Dubois & d'Ochencourt, puis que ce Cavalier assistant dit qu'il n'estoit pas venu pour regarder. Et pour conclusion, ledit Beaufac dist audit Curé, qu'ayans tous mis pied à terre, ils se seroient battus deux contre deux; auquel combat il auoit esté blessé de la blessure de laquelle il estoit lors detenu au lit malade: Et du depuis, ledit Curé luy ayant remonstré qu'il estoit defendu de se battre en duel sur peine d'excommunication, ledit Beaufac luy dit qu'il ne pensoit pas du tout audit accident. Il dit dauantage, qu'ayant fait pareille remonstrance audit Dubois estant à Harceleines le jour de tous les Saints, pour entendre la Messe dans l'Eglise dudit lieu, & que s'il vouloit entrer dans icelle pour entendre la Messe, il ne pourroit la celebrer, à cause de ce qui s'estoit passé; ledit Dubois luy fit responce qu'il n'estoit pas guere friant de Messe, & se retira. Donc il est vray de dire que c'est vn Duel, & n'y a pas moyen de le déguiser.*

Le tesmoignage de plusieurs autres personnes qui ont veu le combat, sert encore à la confirmation de cette verité. Charles Holleuille, premier Tefmoin de l'Informatron faite à la requeste du Procureur Fiscal d'Hellicourt, & qui a esté pareillement produit par ledit d'Ochencourt pardevant le Lieutenant Criminel d'Amiens, depose qu'estant à sa Charuë, il vit venir deux hommes à Cheual, dont l'un tenoit trois levriers en laisse, ils ne chassoient donc pas; & quelque temps apres, il vit aussi arriuer deux autres Cavaliers, qui venoient du costé d'Harceleines, & furent joindre les deux autres Cavaliers, & qu'ils descendirent dans vne piece de terre contenant trente journaux, dependante de la Ferme du Sieur d'Ochencourt, & qu'environ vn demy quart d'heure apres, il les vit remonter tous quatre, qu'ils furent ensemblement dans vne piece de terre occupée par le Fermier du Sieur Cocquet, où ayans mis pied à terre, ils baillerent leurs Chevaux à vn Laquais pour les tenir, & environ vn quart d'heure apres remonterent à Cheual; & apprit ledit Tefmoin par bruit commun, qu'ils se nommoient les Sieurs Dubois & d'Ochencourt, & qu'ils s'estoient battus l'un contre l'autre, sçauoir ledit Sieur d'Ochencourt contre ledit Sieur Dubois, & leurs Vallets l'un contre l'autre, & que dans ce combat le Vallet dudit Sieur d'Ochencourt auoit esté blessé au bras.

Pierre Lion, Valet de Charruë du nommé Pierre Delafosse, gendre de la Fermiere dudit Sieur d'Ochencourt, & auparauant Valet de son Fermier, & Jean de Nibar, Valet aussi de Charruë dudit Delafosse, trois & quatriesme tesmoins de l'information faite à la requeste du Procureur Fiscal d'Hellicourt, & pareillement produit par ledit d'Ochencourt, pardevant le Lieutenant Criminel d'Amiens, 9. & 24. tesmoins de son Information, *deposent du combat & duel précisément; & comme apres que Beaufac fut blessé au bras, il rendit l'espée à l'autre; lequel avec lescdites deux espées, alla droit audit d'Ochencourt, qui rendit aussi son espée audit Sieur Dubois, qui l'a luy rebaila; & qu'apres leur combat cessé, ils remonterent tous quatre à Cheual, & s'en retournerent ensemble, qui est vn fait decifif, mais constant par toutes les depositions vnanimés. Est-ce là vn assassinat.*

Hierosme Douay, François Royer, Jacques Hermaine, François Get, 6. 7. 8. & 9. tesmoins de l'Information faite à la requeste du Procureur Fiscal d'Helicourt, deux desquels, sçauoir lescdits Hermaine & Get ont esté pareillement produits par ledit Sieur d'Ochencourt: 6. & 11. tesmoins deposent pareillement du combat, comme d'Ochencourt & son Vallet allerent les premiers l'un d'eux tenans trois levriers par la laisse, qui est ce que dit Hermaine comme d'autres; ce qui marque que ce n'estoit pas chasser, que de mener ces trois levriers par la laisse, & n'auoir personne à pied, ny aucun chien courant: qu'enfin ils se joignirent tous quatre, qu'ils mirent pied à terre, baillerent les quatre Cheuaux à tenir à vn petit Laquais, que d'autres disent se nommer Ducroc, qui estoit le Laquais dudit Sieur Dubois; qu'ils se battirent, sçauoir les deux mieux vestus l'un contre l'autre, & les deux valets ensemble à pointe d'espée: qu'apres s'estre battus, ils remonterent sur leurs Cheuaux, & prirent ensemblement leur chemin vers Harceleines. Comme de fait, il est vray qu'ils retournerent ensemble tous quatre à Cheual, & ne se separerent qu'en vn lieu où il y a deux chemins, l'un

conduisant à Haudrechie, & l'autre conduisant à Harcelines. Et depuis, lesdits tefmoins depofent qu'ils apprirent que le Vallet du Sieur d'Ochencourt auoit esté bleffé au bras: Le nommé Charles Holleuille, premier tefmoin de l'Information d'Hellicourt, & 4. tefmoin de celle d'Amiens, rapporte mefme cette circonftance, *que les quatre Cavaliers eftoient defcendus dans vn fonds nommé la Vallée des Barillets, & que n'ayans pas trouué le lieu propre, ils remonterent tous quatre à Cheual, & furent enfeiblement dans vne piece de Pré occupée par le Fermier des Heritiers du Sieur Cocquet; Ce qui eft confirmé par la depofition de Iacques François, dixiefme tefmoin de la mefme information, qui le declare expreffément; & encores par celle de Maiftre Charles Langlois Curé d'Harceleines, Cousin germain dudit defunct Beaufac, en fon recollement, en ce qu'il dit qu'il apprit dudit Beaufac, l'un des Combattans, l'estant allé vifiter au lit, qu'estant defcendu dans vn fonds, ils remonterent enfeemble fur vn haut, & que là eftans montez, ils fe battirent.*

Ledit de Beaufac luy-mefme interrogé par le Bailly d'Hellicourt, & oüy comme tefmoin par le Lieutenant Criminel d'Amiens, à la requête dudit d'Ochencourt, a dit, *qu'ils s'eftoient battus deux contre deux, & auoient mis pied à terre pour cela; Il a voulu biaifer fur des paroles qu'il feint auoir esté par luy dites, & par d'Ochencourt, pour s'excuser de fe battre, lesquelles ne font que dans la bouche dudit Bransac vrayes, elles font fans apparence par toutes les circonftances de ce qui a précédé; & ce qui a fuiuy le combat à joindre encore cette autre circonftance, refultant de la depofition dudit Langlois en fon recollement, qu'ils eftoient defcendus dans vn fonds, & remonterent enfeemble pour trouuer vn lieu propre, au parauant que ledit d'Ochencourt eust demandé audit Beaufac s'il fe vouloit battre; à quoy il fit refponfe qu'il feroit ce qu'il pourroit, & puis qu'ils eftoient montez à l'auantage, comme il a esté monftré cy-deffus, & que les autres n'eftoient montez que fur des petits bidets, ils ne fe fuflent pas battus enfeemble s'ils n'euffent voulu, car ledit Beaufac a confeffé luy-mefme par fon Interrogatoire, qu'il auoit veu venir ledit Sieur Dubois & fon Vallet droit à eux, qui marchotent aux pas de leurs Cheuaux. Ledit Langlois ajoûte auoir appris dudit Beaufac, qu'ayant apperceu lesdits Dubois & fon Valet venir avec vn Laquais, il en auoit donné avis audit Sieur d'Ochencourt, auquel il refpondit, *Laiſſe les venir; Donc il n'y eut jamais vne calomnie plus horrible que celle portée par la plainte dudit d'Ochencourt, par laquelle il a fupposé que l'on l'auoit fait affaffiner par des gens qui l'attendoient fortant de fa maifon armez de mousquets; & au contraire, c'estoit luy qui attendoit en faifant feignant de chaffer, & eftoit le premier au rendez-vous; & apres s'est battu, & tous les Combattans ont remonté à Cheual, & fe font retirez tous enfeemble.**

TROISIEME OBSERVATION.

Retraite des Combatans, & penſement de Beaufac, depuis decedé.

L'Ifſuë du Combat juſtifie encores parfaitement le duel, non ſeulement par ce que tous les quatre Combatans ayans remonté à Cheual, ſe ſont retirez enfeemble ſans bruit, ſans murmure, ſans plainte de qui que ce ſoit: Mais encore parce que l'un d'iceux eſtât bleffé au bras, l'autre luy bail-la ſon mouchoir pour ſerrer ſa playe, & luy dit qu'en pareille rencontre il luy auroit donné ſa chemiſe: Et apres cela, ledit d'Ochencourt pour empêcher que la playe de ſon Vallet ne deſcouriſt le combat & duel, il luy donna charge expreſſe, & luy commanda de dire qu'ils'eſtoit bleffé luy-mefme, & luy commanda encore de ſ'en ſouuenir par le nommé Godart.

La Preuue eſt conſtante de ce fait, par l'Interrogation de Beaufac mefme, ſuby pardeuant le Bailly d'Hellicourt, & au milieu des déguiſemens qu'il taſche d'apporter, pour excuſer ſon crime à luy-mefme; Il demeure d'accord qu'ils ſe battirent les vns contre les autres, & ne parle d'autre choſe que de ſe battre; dit que comme il fut bleffé au bras droit d'un coup d'eſpée, apres quoy ſon eſpée luy fut priſe par le Combattant, qui alla vers les deux autres, les Sieurs d'Ochencourt & Dubois; que d'Ochencourt pria Dubois de commander à l'autre qu'il n'approchaſt pas: Dubois luy repartit, *qu'il falloit rendre l'eſpée*, ce que fit d'Ochencourt, & auſſi-toſt le Sieur Dubois la luy rendit; Voylà les circonſtances les plus naturelles & les plus precifes d'un duel. Il adjouſte, qu'en ſuite ils remonterent tous quatre à Cheual, & prirent leur chemin enfeiblement pour deſcendre, tant à Harceleines qu'à Haudrechie. Il dit dauantage, que lors qu'il fut enuoyé à Gamaches pour eſtre penſé & medicamenté, ledit Sieur d'Ochencourt luy commanda de dire qu'il s'eſtoit bleffé luy-mefme, & luy défendit de rien teſmoigner à perſonne de ce qui s'eſtoit paſſé; cela eſt confirmé par les depofitions de Maiftre Charles Langlois, vnzieſme Tefmoin de l'Information d'Hellicourt, & en ſon recollement: de Guillaume Leſueur Maiftre Chirurgien, premier Tefmoin de l'Information d'Amiens, & douze Tefmoin de celle d'Helicourt, & qui tous depofent des particularitez qu'ils apprirent pendant la maladie dudit Beaufac; & ledit d'Ochencourt mefme a eſté forcé de le confeſſer par ſon Interrogation, & dit que ce fut les autres Combattans qui luy firent dire: Mais les tefmoins ne diſent pas cela,

& au contraire, il fit tout ce qu'il put apres estre separé d'eux *pour couvrir cela*, & obligea ledit Beaufac de ne pas dire autre chose, sinon qu'il s'estoit blessé luy mesme. Jeanne Mercier sa Fermiere, dixseptiesme Tefmoin de l'Information d'Helicourt, depose combien elle eut de peine à luy faire dire, & encore tout bas à l'oreille, *qu'il s'estoit battu*, & la chargea en partant pour s'en retourner à Abbeville, de dire audit Beaufac qu'il se souvient bien de ce qu'il luy auoit dit : Mais plus precisément, Pierre Godart fils de cette Fermiere, & demeurant en ladite Ferme, dix-neufiesme Tefmoin de l'Information d'Helicourt, deppose qu'apres le combat estant dans le Iardin de ladite Ferme d'Haudrechic, le Sieur d'Ochencourt luy dit *que son Vallet s'estoit blessé au bras, & qu'il l'auoit enuoyé faire panser à Gamache*; & surce que ledit Godart luy demanda comme cela estoit arriué, il persista à luy dire qu'il s'estoit blessé luy-mesme, & receut commandement dudit d'Ochencourt de donner ordre au pensement & medicament dudit Beaufac; ce qu'il fit : & dans son Recollement, il adjouste, que lors que ledit d'Ochencourt luy enjoignit de dire à Beaufac *qu'il se souuint de dire tousiours ce qu'il luy auoit dit* : & dans sa Deposition d'Helicourt sur la fin, il raconte que reuenant de Gamaches à Haudrechic avec ledit Beaufac blessé : & s'informant de luy par qui il auoit esté blessé, ledit Beaufac luy auoit respondu qu'il s'estoit blessé luy-mesme : Et comme ledit Godart ne le pouuoit croire veu la grandeur, laquelle d'ailleurs estant au bras droit, il n'y auoit pas d'apparence qu'il se fust blessé luy-mesme, il l'auroit pressé sur le chemin de luy en dire la verité; & pour lors ledit Beaufac luy dist, *que ledit d'Ochencourt son Maistre s'estoit battu contre le Sieur Dubois, & luy contre vn Cavalier, auquel Combat il auoit esté blessé; & qu'il le prioit de n'en rien dire, attendu que ledit Sieur d'Ochencourt luy auoit defendu de n'en rien tesmoigner à personne, & de dire à tous ceux qui s'en enquesteroient qu'il s'estoit blessé luy-mesme*. Apres cela se peut-il voir vn Duel mieux averé, & vne calomnie d'assassinat plus noire que celle que ledit d'Ochencourt a voulu imposer audit Sieur d'Harceleines, qui n'a esté ny veu ny sceu, ny entendu en ce Duel, & qui mesme estoit absent du pays lors que le tout est arriué.

QUATRIESME OBSERVATION.

Course du Sieur d'Harceleines à son arriuée de Normandie, ayant appris la nouvelle de ce qui s'estoit passé en son absence.

C'Est vne chose deplorable de voir le Sieur d'Ochencourt si fort ennemy de la verité & de l'honneur, que de vouloir peruertir le sens de toutes choses, que faire degenerer en crime les plus belles & vertueuses actions par des mensonges grossiers sans preuue & sans apparence, comme lors qu'il a dit par sa plainte, que le Sieur d'Harceleines, assisté de Dubois & de son Valet à Cheual, & d'un Paisan en croupe, estoient allez à toute bride fondre sur luy, lors qu'il s'en retournoit à Abbeville, iurant, blasphemant le Saint Nom de Dieu, & le menaçant que s'il parloit dudit assassinat, il le tueroit à la premiere rencontre : il y a bien du desauantage par son Interrogatoire; Car voulant recuser le tesmoignage du Sieur de Favencourt qui y estoit present, lequel pour cet effet il suppose contre verité estre parent du Sieur d'Harceleines : Il a composé vne fable de nouvelle inuention à ce sujet, contraire au contenu de sa plainte, & dit qu'il l'aborda, en disant au Sieur de Favencourt : *Mon Dieu, mon Cousin, vous la sauuez belle* : & puis s'adressant à luy d'Ochencourt, il luy dit : *Bon Bougre, Bon Jean Foutre que vous estes, sçachez que j'ay donné des coups de baston au Valet qui auoit le fuzil, parce que ie luy auois donné ordre de vous donner vn coup de fuzil dans la teste; ce qu'il n'a pas fait; vous me voulez mettre en Iustice, & me chicanner, c'est bien à vous à faire*. Ce qui obligea ledit d'Ochencourt de luy promettre qu'il ne l'inquieteroit plus, & luy quitteroit tous ses droits : & lors ledit d'Harceleines luy dit : *Mon Dieu, ce n'est pas cela, il faut mettre l'espée en la main* : & que lors ledit d'Ochencourt luy ayant dit : *Vous me voulez donc tuer, puis que ie suis seul contre quatre* : Ledit d'Harceleines luy dit, *Que ce n'estoit pas à l'heure, mais qu'il allast à Abbeville chercher de ses amis, & que le lendemain il le vint trouuer aux Fauxbourgs où il alloit coucher; ce qu'il fut contraint de luy promettre pour éuiter sa mauuaise volonté*. Que si l'on peut accorder sa plainte, & le contenu en son Interrogatoire; l'on peut joindre les deux Poles; car ce sont deux calomnies différentes, & directement opposées l'une à l'autre. Par sa plainte il dit que ledit Sieur d'Harceleines estoit couru à toute bride, & l'auoit menacé de le tuer, s'il parloit de l'assassinat commis en sa personne, & ne dit autre chose. Et par cet Interrogatoire, il dit qu'il l'appella en duel, & qu'il y eut parole donnée pour se battre le lendemain. En faut-il dauantage pour reconnoistre la malice dudit d'Ochencourt.

Difons plus, non seulement le tesmoignage de duel, & de toutes les circonstances cy-dessus exposées dans leur ordre, seruent encore audit Sieur d'Harceleines pour destruire les calomnies dudit d'Ochencourt : Mais outre cela, il est vray de dire que de tous les faits par luy mis en auant, il n'y a preuue ny conjecture quelconque au procez; C'est le tesmoignage qu'en porta à la Cour Monsieur l'Aduocat

l'Aduocat General Talon, comme il se void par l'Arrest contradictoire du 19 Fevrier 1655. depuis lequel temps il n'y a point de nouuelle preuve. Et au contraire, ledit d'Ochencourt confus & aveuglé de sa propre malice, comme parle l'Ecriture, & *excœcauit eos malitia eorum*, a varié sur les faits calomnieux qu'il auoit imposez audit Sieur d'Harceleines, & a changé comme du blanc au noir, ainsi qu'il vient d'estre representé; & ce qui a manqué dans la procedure, & dont ledit Sieur d'Harceleines ne se peut taire; c'est que l'on ait obmis d'oïr ledit Sieur de Fauencourt, qui n'est pas son parent, comme l'on a depuis supposé, & qui estoit vn Tefmoin necessaire de ce qui se passa à l'abord dudit Sieur d'Harceleines, aussi bien que ce Combat-duel, qui auoit esté fait le matin en l'absence dudit Sieur d'Harceleines, dont il fut amplement parlé, & de toutes les circonstances d'iceluy, en presence dudit Sieur de Fauencourt, qui estoit l'Arbitre de l'accommodement, & deuoient les Combatans s'embrasser le lendemain: & iamais il n'y eust rien tenu plus assuré, ny de principe plus certain en l'accommodement que ce fait de Duel, confessé par tous les Combatans.

Mais pour conuaincre encore dauantage ledit d'Ochencourt, de la calomnie qu'il a voulu imposer audit Sieur d'Harceleines, qui n'a iamais esté capable d'une mauuaise action, qui est de trop bonne naissance pour en souffrir seulement le soupçon: & qui en effet a pratiqué dans ce rencontre ayant appris la nouuelle du duel, tout ce qu'un Homme d'honneur & de sa condition, pouuoit faire pour accommoder vn tel differend, d'entre son frere naturel, qui estoit lors dans sa maison, & le Sieur d'Ochencourt qui est son voisin, ayant pour cét effet remonté à cheual tout aussi-tost, pour couper de bonne heure la racine au mal. Il a cét aduantage, que non seulement il n'y a point de preuve des faits dudit d'Ochencourt, & qui se destruisent les vns les autres, comme il a esté dit: Mais outre cela, il est justifié, tant par son Interrogatoire, que par les Depositions de Maistre Charles Langlois, Curé d'Harceleines, qu'il estoit absent lors du combat: & les autres Depositions justifient qu'il n'alla apres ledit d'Ochencourt, menant avec luy les deux qui s'estoient battus que pour luy faire ciuilité, sçauoir au vray comme l'affaire s'estoit passée, & pourquoy, & pour l'accommoder au mesme temps. Au defaut de la Deposition obmise du Sieur de Fauencourt, en la compagnie duquel estoit ledit d'Ochencourt, lors que ledit Sieur d'Harceleines l'aborda s'en retournant à Abbeuille: Il y a quatre tefmoins ouïs à la Requête dudit d'Ochencourt, dans l'Information du Lientenant Criminel d'Amiens, par laquelle il a déclaré *qu'il prenoit droict*, lesquels parlent du fait dont est question.

Le premier est Nicolas Gomarre vingtiesme Tefmoin de ladite Information, dans son Recollement, où il a dit que le lendemain du Combat, dont il a parlé dans sa Deposition, il apprit que ledit Sieur d'Harceleines estoit allé apres ledit Sieur d'Ochencourt pour les accommoder, & pour y mettre le bien; C'est vn Tefmoin prodit par Ochencourt mesmes, qui parle.

Autant en dit Hubert Ducroc, demeurant, aussi bien que le precedent Tefmoin, audit Haudrechie, & tous deux Vassaux dudit d'Ochencourt.

Le troisieme Tefmoin, est, Pierre de la Fosse, vingt-quattiesme Tefmoin de l'Information d'Amiens, ouï à la Requête du Sieur d'Ochencourt, qui depose que le 30. Octobre, estant allé du matin à Abbeuille, & en retournant, deux heures de releuée, il fit rencontre du Sieur d'Ochencourt, & d'un autre à cheual avec luy (c'estoit le Sieur de Fauencourt) qui marchoient à costé l'un de l'autre, tenans le chemin de ladite Ville; & qu'un bon quart d'heure apres, il fit aussi rencontre du Sieur d'Harceleines, & d'un autre Gentilhomme à luy inconnu, lesquels marchoient au grand galop de leurs Cheuaux vers ladite Ville; ce qui luy fit croire qu'il arriueroit quelque malheur, pourquoy il s'arresta tout court, pour voir ce que feroit ledit Sieur d'Harceleines quand il auroit atteint ledit Sieur d'Ochencourt: & veit ledit de la Fosse, *que ledit Sieur d'Harceleines ayant ioint ledit Sieur d'Ochencourt, mirent tous la main au chapeau, & marcherent en suite ensemblement*: & incontinent apres, & en deça du Village de Treulle, ledit de la Fosse rencontra encore vn autre Cavalier qui alloit au pas de son Cheual; Cela marque donc tousiours le contraire de la fausse & calomnieuse Accusation dudit d'Harceleines.

Le quattiesme Tefmoin, nommé Iean le Leu, Valet du Sieur Valenglas, proche parent du Sieur d'Ochencourt, ouï à sa Requête vingt-sixiesme Tefmoin de l'Information d'Amiens, dit aussi qu'il les rencontra marchans tous ensemble, & ne dit rien du tout des faux faits mis en auant par ledit Sieur d'Ochencourt, lequel consequemment, ne sçauroit éuiter la peine qu'il merite, pour le crime qu'il a commis, qui est l'interest du public, depósé entre les mains de Monsieur le Procureur General du Roy, & de tous ses Officiers, suiuant les Ordonnances des Duels: mais pour l'injure atroce, & la calomnie noire & malicieuse qu'il a voulu imposer audit Sieur d'Harceleines.

10
CINQUIESME OBSERVATION.

Procedé dudit d'Ochencourt.

IL ne reste plus que de faire voir par le procedé dudit d'Ochencourt, qu'il est dans la plus infame mauuaise foy pour tout ce qu'il a fait & entrepris, qu'il se puisse représenter; Ce qui se peut recueillir de trois ou quatre circonstances fort remarquables.

La premiere, resulte des pensées diuerses de calomnies qu'il a inuentées contre le Sieur d'Harcelcines, desquelles il ne s'est pû accorder avec luy-mesme, disant tantost d'une façon, tantost de l'autre, comme il a esté cy-deuant représenté; Ce qui part assurément d'un mauuais esprit, & fort dangereux dans la société ciuile. Il est Accusateur, ce dit-il, & il ne sçait pas seulement ce qu'il veut dire, ny dequoy il doit composer son Accusation: La calomnie est ainsi bizarre, & elle n'est iamais moins inquiète, qu'insolente; C'est pourquoy dans le progresz, on apperçoit tousiours les defauts de son ouurage: & c'est ordinairement elle-mesme qui fait iour à la verité.

La seconde circonstance, resulte de ce que ledit d'Ochencourt a quitté les Iuges des lieux apres le Combat, non seulement sans se plaindre: mais au contraire, comme il s'estoit battu de gré à gré, & s'en estoit reuenu avec les autres Combatans, de compagnie, il a fait tout ce qu'en pareil rencontre vn Homme peut faire pour cacher vn Duel. Il ne s'est pas plaint d'auoir esté assassiné, ny aux spectateurs qui ont depose, ny à sa Fermiere d'Haudrechies, non plus qu'à Pierre Godard son fils, auquel au contraire il a dissimulé le Combat, & dit que son Valet s'estoit blessé luy-mesme; A chargé aussi ledit Vallet bien expressément de ne rien dire de l'action; & que quand il seroit pressé, il dist tousiours qu'il s'estoit blessé luy-mesme: & cela avec tant de soin, qu'il luy manda encore, tant par ladite Fermiere, que par Pierre Godard, de bien se souuenir de ce qu'il luy auoit dit. Apres cela, quand ils sont allez de compagnie à Abbeville, dans les propositions d'accommodement qui deuoit estre executé le lendemain: Ledit d'Ochencourt ne s'est point encore plaint qu'il luy eust esté fait chose quelconque. Et cependant c'estoient les Iuges Royaux de la Prouince, & qui pouuoient venir en concurrence avec le Iuge des lieux, c'est à dire de la Baronnie d'Helicourt, laquelle est du ressort ordinaire de la Senechaussée de Ponthieu. Au lieu dequoy quelque tēps apres il est allé choisir le Lieutenant Criminel d'Amiens, hors du ressort, auquel supposant en termes exprés, que ce fut dans sa Iurisdiction, il a fait vne plainte d'assassinat: Le Lieutenant Criminel d'Amiens a receu sa plainte, & la datée du dernier iour d'Octobre 1654. & pour luy faire plaisir en toutes manieres, il s'est transporté à Gamache, & a composé vne information, où il tronquoit les Depositions des Temoins, & aidoit à la lettre tant qu'il luy estoit possible; ce qui est prouué, parce que les mesmes Temoins ayans esté ouïs par le Iuge de la Baronnie d'Helicourt, à la Requête du Procureur Fiscal, ils n'ont pas borné leurs Depositions comme dans l'Information du Lieutenant Criminel d'Amiens, qui a commis tant de vilenies en cette affaire-là, qu'il a excité le Substitut de Monsieur le Procureur General, & tout le Siege contre luy, ayant voulu commettre des gens à sa fantaisie, & pour le Substitut de Monsieur le Procureur General, & pour le Greffier; Ce qui a esté le sujet d'un Adournement personnel contre luy decerné par la Cour, sur la plainte qui en a esté faite: & en vn mot, il ne pouuoit estre le Iuge de l'affaire, en quelque façon que ce fust; Car la plainte, telle que la faisoit ledit d'Ochencourt, qui qualifioit l'action du nom d'Assassinat, ne pouuant estre, suivant la Coustume des lieux, portée pardeuant autre Iuge que celui de la Baronnie d'Helicourt: & se trouuant apres l'Information, que c'estoit vn Duel, il ne pouuoit y auoir qu'un Iuge Royal, capable d'instruire: mais ce n'estoit pas le Lieutenant Criminel d'Amiens, lequel n'ayant pas de Iurisdiction naturelle pour cela, n'en auoit d'attribuée par aucun Arrest de la Cour: & consequemment tout ce qu'il a fait à la Requête dudit d'Ochencourt par affectation & confédération, n'est considerable qu'en ce qu'il est à charge contre ledit d'Ochencourt.

La troisieme circonstance, resulte, de ce que ledit d'Ochencourt pour destourner la pensée des Iuges, du crime de Duel qui luy est imputé, veut faire croire deux choses esgalement fausses, & n'a presque autre chose à dire, sinon qu'il est vn ieune homme sortant des estudes; & l'autre qu'il ne fait profession des armes; qu'il est vn simple Bourgeois d'Abbeville; qu'il n'est pas capable d'auoir eu la pensée de se battre en Duel.

Mais il n'est pas mal-aisé de respondre, & faire voir que ces illusions ne sont pas capables de surprendre seulement des esprits mediocres, d'autant que pour ce qui regarde son aage, il a dit luy-mesme dans son Interrogatoire, qu'il estoit aagé de vingt-six à vingt-sept ans; & il en a encore caché trois ou quatre, parce qu'il y a trop long-temps qu'il est maistre de son bien, & qu'il agit comme il agit en pleine Majorité. Mais quoy qu'il en soit, l'aage de 26. à 27. ans, est l'aage le plus propre & le plus conuenable & le plus disposé pour se battre en duel, & n'est pas necessaire de faire icy vn Traicté de Morale, pour en expliquer les raisons: L'experience journaliere, & les preuues du Procez,

sont plus considerables pour juger vne affaire de cette nature, que des Discours qui n'ont ny fondement ny apparence de raison.

Et quant à ce qui est de la qualité, il est vray que ledit d'Ochencourt n'est pas Gentilhomme: mais il en veut vsurper la qualité en tout lieu & en toute rencontre, parce qu'il est riche de dix ou douze mil liures de rente, & n'a point d'autre Employ que de porter l'espée, & faire le Gentilhomme; & c'est pourquoy ils s'est voulu battre en Duel, & en pensoit tirer grand aduantage pour se signaler, s'il eust mieux reussi contre le Sieur Dubois. Et quoy que ce ne soit pas vne bonne raison, ny vn bon moyen de persuader, de dire qu'un homme ne s'est pas battu en Duel, parce qu'il n'est pas Gentilhomme: neantmoins ledit Sieur d'Harceleines tire aduantage de cette mauuaise défaite artificieusement recherchée par ledit d'Ochencourt, depuis la plaidoirie du 19. Fevrier 1655. *Auparauant laquelle, en tous les Actes, ledit d'Ochencourt a tousiours vsuré la qualité d'Escuyer: mais comme il a veu que cette nouvelle Qualité qu'il taschoit d'obtenir à mauuais Tiltre, seruoit à conduire la pensée de Messieurs les Iuges à la verité du Combat & Duel par luy fait: Depuis ce temps, il ne se dit plus Gentilhomme, & ne prend plus la qualité d'Escuyer, il y a renoncé par ses Conclusions Ciuiles, & dit qu'il n'est qu'un simple Bourgeois, & voudroit bien passer à present pour vn homme qui n'auoit iamais manié d'espée, quoy qu'il s'en mesle il y a plus de douze, voire quinze ans, qu'il n'ait iamais fait autre chose, non pas à la verité pour le seruice du Roy, mais pour se faire craindre, & faire le puissant dans ses Terres; ce que ledit Sieur d'Harceleines ne luy a iamais enuié, quoy qu'il fust fort facile de luy faire rayer cette qualité vsurpée, mesmes le faire condamner en 2000 l. d'amande à la Cour des Aydes, comme il se pratique, si ledit Sieur d'Harceleines luy eust voulu du mal.*

Et pour monstrier que c'est de tout temps, que ledit Sieur d'Ochencourt a vsuré cette Qualité de Gentilhomme, & qu'il vouloit passer pour tel, ledit Sieur d'Ochancourt en quantité d'actes n'en a pas fait vn seul, où il n'ait pris cette qualité d'Escuyer. Mais sans sortir de la cause, en laquelle il tousiours se renfermer, il paroist par la Plainte que fit ledit d'Ochencourt au Lieutenant Criminel d'Abbeville le 26. Septembre 1652. touchant les Gens de Guerre qui auoient esté, comme il pretendoit, en sa Terre dudit Haudrechies, qu'il prenoit dès ce temps-là la qualité d'Escuyer Sieur d'Ochencourt & d'Haudrechies: Et cette Plainte, qui n'a esté suiuite d'aucune chose, parce qu'il n'y auoit pas de fondement, sert encor à faire voir qu'il y a long-temps qu'il agit comme Majeur: Mais dauantage, qu'il a bien sceu, quand il s'est adressé au Lieutenant Criminel d'Amiens pour le fait dont est question, qu'il n'estoit pas competent. Et en effet, toutes les circonstances de l'affaire & cette affectation de juge, ainsi choisi au loin, marque vn dol si manifeste en tout le procedé dudit d'Ochencourt, qu'il agraué son crime. Et ne fut jamais dit qu'un Gentilhomme eust bonne grace de faire toutes sortes de vilenies pour éuiter la peine des Ordonnances, & se sauuer de la punition d'un crime qui autrefois estoit puny de la peine du Talion, & parmy, nous arbitrairement & selon les particularitez du fait.

Car de pretendre que ce soit vne bonne raison pour embarasser ledit Sieur d'Harceleines, de dire que son frere naturel estoit en sa maison, il n'y a pas d'apparence. Si le Sieur Dubois a failly, le Sieur d'Harcelcines n'entreprend pas de le defendre: Tous delits sont personnels. Le Sieur Dubois qui est Officier de Caualerie depuis douze ans, estoit venu voir ledit Sieur d'Harceleines à l'occasion de la mort de sa Femme qui estoit recente, il y sejourna enuiron quinze jours: Et pendant ce temps-là, d'Ochencourt luy a fait vne querelle d'Alleman à l'occasion d'une Levrette perdue: Il l'a attaqué, & se sont battus en Duel, à l'insceu & en l'absence dudit Sieur d'Harceleines: Qu'y eust-il pû faire? Il est vray que l'un & l'autre ont peché contre l'Ordonnance, particulièrement contre l'Article XVII. de celle du mois de Septembre 1651. verifiée en la Cour, laquelle condamne de Duel & de toutes las peines de Duel, *tous ceux qui se battront seuls, & en pareil estat & nombre, avec armes égales de part & d'autre, à pied ou à cheual: Suiuant laquelle Ordonnance Dubois & d'Ochencourt sont également coupables.* Mais il suffit que ledit Sieur d'Harceleines, n'a eu participation quelconque au Combat qui a esté fait: Et il ne pouuoit pas agir avec plus de generosité & d'honneur qu'il fist dès aussi-tost qu'il fut arriué, & qu'il en eut appris la nouvelle, ayant monté tout aussi-tost à cheual & mené les deux Combatans, & à l'instant trouué ledit d'Ochencourt pour sçauoir au vray ce qui s'estoit passé, & accommoder l'affaire: Ce qui n'ayant pas réussi à son grand regret, & voyant que la Iustice en prenoit connoissance, il dist audit Dubois, qu'il pouuoit se retirer de sa maison; Mesmes le Curé d'Harceleines ayant fait Remonstrance audit Dubois le jour de la Feste de Toussaincts, qu'il ne pouuoit celebrer la Messe, s'il estoit dans l'Eglise, attendu que les Duellistes estoient excommuniés; ledit Dubois luy dist (comme ledit Curé a depose) qu'il n'estoit pas friand de Messe, & qu'il se retira: ce qu'il fit aussi de la maison du Sieur d'Harceleines, lequel n'a jamais fait aucune action digne de reproche; & n'y auoit que d'Ochencourt capable de l'accuser, & de luy imposer vne calomnie si noire & si grossiere que celle qui a esté cy-dessus exagerée.

Monfieur HERVE', Rapporteur.



[The text in this section is extremely faint and largely illegible due to fading and bleed-through from the reverse side of the page. It appears to be a continuous block of text, possibly a letter or a report.]

